

आकाशवाणी रायपुर (छत्तीसगढ़)
प्रादेशिक समाचार बुलेटिन

18.00 शुक्रवार

दिनांक 04.05.2012

कलेक्टर-सीएम-कॉन्फ्रेंस

मुख्यमंत्री डाक्टर रमन सिंह ह नक्सल परभावित क्षेत्र मन म बंधक बनाय के मुद्दा ल लेके एक ठन राष्ट्रीय नीति बनाय के बात किहीन हे।

आज नई दिल्ली म संवाददाता मन ले गोठबात करत मुख्यमंत्री डाक्टर रमन सिंह ह सुकमा जिला के कलेक्टर श्री एलेक्स पॉल मेनन ल छोड़ाय बर राज्य सरकार अउ माओवादी मनके बीच कोनों भी परकार के अंदरूनी सौदा या समझौता के खबर के खंडन करीन। ओमन किहीन दूनों पक्ष के मध्यस्थ मन ह कलेक्टर के रिहई म महत्ता वाले भूमिका निभाय हें। मुख्यमंत्री ह यहु किहीन कि उंखर सरकार ह माओवादी मनके संघरा मध्यस्थ मनके जरिया ले होय समझौता के अनुसार एक ठन समिति बनाय हे। ये समिति ह प्रदेश के जेल मन के बंदी मन उपर अउ विचाराधीन मामला उपर काम करही अउ अनुशंसा करही। ये सब्बो मामला मन ह कोर्ट म जाही। ए दउरान सरकार के एमा कोनों हस्ताक्षेप नई रइही। मुख्यमंत्री ह किहीन कि कमेटी के अनुशंसा होही अउ ओखरे अधार म न्यायालय ह फइसला लीही।

एती, रईपुर म राज्य सरकार डहार ले बनाय गे उच्च स्तरीय स्थायी समिति के दूसर बइठका होइस, जेमा जनजाति वर्ग के मनखे मनके अईसन मामला के समीक्षा करे गीस, जिंखर जांच अउ मुकदमा के कार्रवाई लंबित हांवय। मध्यप्रदेश के पूर्व मुख्य सचिव श्रीमती निर्मला बुच ह ए समिति के अध्यक्ष हांवय अउ राज्य के मुख्य सचिव अउ पुलिस महानिदेशक एखर सदस्य हे। पुलिस अउ प्रशासन के दूसर बइठका अधिकारी मन ह घलोक ए बइठका म भाग लीन। सुकमा जिला के कलेक्टर श्री मेनन ल छोड़े के बाद काली रतिहा ए समिति के पहिली बइठका होइस। सरकार अउ माओवादी मनके मध्यस्थ मनके बीच होय समझौता के अनुसार ए समिति के गठन श्री मेनन ल छोड़े जाय के सूचना के पांचे मिनट बाद कर दे गे रिहीस।

इही बीच श्री मेनन दूनों मध्यस्थ डॉक्टर बी.डी. शर्मा अउ प्रोफेसर हरगोपाल के संग आज सुकमा पहुंचीन।

एनसीटीसी – बैठक

नई दिल्ली म काली राष्ट्रीय आतंकवाद रोधी केंद्र – एनसीटीसी के गठन के विवादित मामला उपर बिचार करे बर मुख्यमंत्री मनके बइठका राखे गे हावय। ए बइठका के उद्घाटन प्रधानमंत्री डाक्टर मनमोहन सिंह ह करहीं।

समाचार एजेंसी यूनीवार्ता के मुताबिक प्रधानमंत्री ह एनसीटीसी बर केंद्र अउ राज्य के बीच म आम सहमति बनाय के जरूरत उपर जोर दीन हे। गृहमंत्री श्री पी. चिंदबरम ह ये एक दिन के बइठका म एनसीटीसी उपर केंद्र सरकार के बिचार रखहीं।

खबर के मुताबिक एमा एनसीटीसी के कामकाज के प्रकिया एसओपी उपर घलो विस्तार ले चर्चा होय के संभावना हे।

उहें, ए बइठका म सामिल होय बर प्रदेश के मुख्यमंत्री डाक्टर रमन सिंह ह नई दिल्ली पहुंच गे हांवय।

कृषि मंत्री – पवार

केंद्रीय कृषि मंत्री श्री शरद पवार ह आज नई दिल्ली म किहीन कि कृषि क्षेत्र ल निजी कंपनी मनके हाथ म नई दे जाही। ओमन किहीन कि कृषि के पैदावारी ल बढ़ाय अउ खाद्य सुरक्षा बर उपसमिति बनाय गे हे।

ए जानकारी राज्यसभा म प्रश्नकाल के दउरान देवत श्री पवार ह किहीन कि पैदावारी बढ़ाय बर कतकोन उपाय करे जावत हे। एमा कृषि उत्पाद के पूर्ति के क्षेत्र म निजी निवेश बर कृषि खरीद के नियम ल उदार बनाय बर, न्यूनतम समर्थन मूल्य म एक घांव फेर बिचार करे बर अउ कृषि ऋण ल बीमा ले जोड़े जईसन उपाय हावय। श्री पवार ह बतईन कि उपसमिति म चरणबद्ध तरीका ले ग्रामीण बैंक मन म प्रतिस्पर्धा बढ़ाय अउ सुधार करे के सुझाव दीन हे। कृषि मंत्री ह किहीन कि कृषि पार्क अउ अनुसंधान अउ बिकास म निवेश बढ़ाय के घलोक सुझाव दे गे हावय।

एपीएल-राशन कार्ड

रईपुर नगर-निगम क्षेत्र म सार्वजनिक वितरण प्रणाली म कम्प्यूटरीकृत एपीएल राशन कार्ड बांटे के काम चालू होगे हे। रईपुर के कलेक्टर ह एपीएल राशन कार्डधारी उपभोक्ता मन ले राशन कार्ड जल्दी ले के आग्रह करे हांवय।

विभाग के अधिकारी मन ह बतईन हे कि एपीएल उपभोक्ता मन ल उचित मूल्य दुकान मन ले अवइया महीना ले कम्प्यूटरीकृत राशन कार्ड देखाय म ही राशन दे जाही। ओमन बतईन कि ए कार्ड मन ल बांटे के काम नगर-निगम के जम्मो आठ जोनल कार्यालय मन म करे जावत हे।

खबर के मुताबिक रईपुर शहर के जम्मो राशन दुकान मन म कोर पीडीएस प्रणाली के बेवस्था ए जून ले चालू हो जही। ए बेवस्था म एपीएल उपभोक्ता मन ल कम्प्यूटरीकृत राशन कार्ड के माध्यम ले खाद्यान्न दे जाही।

बैगा-जनजाति

राज्य सरकार ह प्रदेश के बिसेस पिछड़ा बैगा जनजाति के बिकास बर कबीरधाम जिला ल करीबन छै करोड़ रुपिया के राशि दे हावय, जेमा ले करीबन दू करोड़ रुपिया के लागत ले बैगा मन बर चार सौ पन्दरा ठन मकान बनाय जाही।

आदिम जाति अउ अनुसूचित जाति विकास विभाग के साहब मन ह बतईन कि कबीरधाम जिला म रहइया बैगा मनके बिकास बर केंद्रीय क्षेत्रीय बिसेस पिछड़ी जनजाति योजना म करीबन साढ़े चार करोड़ रुपिया अउ बिसेस केंद्रीय सहायता योजना म करीबन डेढ़ करोड़ रुपिया मिले हे। ओमन बतईन कि ए परईसा ले बैगा मन बर तीन ठन सामुदायिक भवन बनाय जाही अउ खेती-किसानी बर पानी के बेवस्था करे जाही। एखर अलावा स्व-रोजगार प्रशिक्षण म काष्ठ शिल्प प्रशिक्षण बर घलोक प्रावधान करे गे हे।

संक्षिप्त समाचार

जगदलपुर म आज ले वैज्ञानिक मनके उन्नत कृषि तकनीकी बिसय उपर तीन दिवसीय कार्यशाला के आयोजन करे जावत हे। ए कार्यशाला म मध्यप्रदेश, छत्तीसगढ़ अउ ओडिशा के कृषि वैज्ञानिक मन भाग लेवत हैं।